



MEMORIA DE ACTIVIDADES 2018

DOWN GALICIA



Esta Memoria está escrita en Lectura Fácil.

A Lectura Fácil é unha forma de escribir sinxela e clara.

Así, todas as persoas podemos entender os textos.

En lectura fácil utilizamos unha letra fácil de ler, un tamaño de letra grande e espazos entre as liñas maiores aos habituais.

DOWN GALICIA

Down Galicia comezou a traballar en 1998.

É unha Federación. Isto quere dicir que está formada por varias asociacións distintas.

Agora mesmo hai 7 asociacións e 1 fundación que forman parte de Down Galicia. Estas asociacións están en Ferrol, A Coruña, Santiago de Compostela, Lugo, Ourense, Pontevedra e Vigo.

Neste momento, a Federación e as súas entidades membro dan servizo a 630 persoas coa síndrome de Down e outras discapacidades intelectuais.

Obxectivos

Traballamos para apoiar ás persoas coa síndrome de Down e discapacidade intelectual para que vivan a vida que elas mesmas elixan.

Para iso, asegurámonos de que se cumpra a Convención Internacional de Dereitos das Persoas con Discapacidade.

É un documento con todos os dereitos que teñen todas as persoas con discapacidade intelectual. É obrigatorio que eses dereitos se cumpran.

Tamén traballamos para mellorar a saúde, para mellorar a educación, e para que todo o mundo coñeza e respecte ás persoas coa síndrome de Down.

Como o facemos

En Down Galicia traballamos para que as persoas coa síndrome de Down e discapacidade intelectual poidan ser autónomas.

Ser unha persoa autónoma significa valerse por si mesma, sen precisar a axuda dos demais todo o tempo.

Traballamos xunto ás persoas coa síndrome de Down, para apoialas en toda a súa vida. Desde que nacen ata que son moi maiores.

Que é a síndrome de Down

Todas as persoas temos no corpo cromosomas.

Os cromosomas fan que cada persoa sexa distinta: morena, rubia, alta, baixa, home, muller.

O habitual é que cada persoa teña 46 cromosomas. Estes cromosomas van de 2 en 2 formando un par. Polo tanto, cada persoa ten 23 pares de cromosomas.

Pero as persoas coa síndrome de Down teñen un cromosoma máis. No par 21, en lugar de ter 2 cromosomas, teñen 3.

Isto fai que precisen máis tempo para aprender algo. Con esforzo e con apoio conseguen todo o que se propoñen.

Principios

- Diversidade. *O normal é ser diferente.*
- Dignidade. *Son unha persoa.*
- Autodeterminación. *Vivo a miña vida.*
- Igualdade de oportunidades. *Coma ti podo, con apoio.*
- Inclusión. *A miña exclusión é o fracaso de todos.*



HISTORIA

1989	- Nace a Asociación para a Síndrome de Down “Down Vigo”.
1991	- Nace a Asociación para a Síndrome de Down “Xuntos”, en Pontevedra.
1994	- Nace a Asociación para a Síndrome de Down de Ferrol “Teima”.
1996	- Nace a Asociación para a Síndrome de Down de Lugo “Down Lugo”.
1997	- Nace a Asociación para a Síndrome de Down “Down Compostela”.
1998	- Nace a Federación Down Galicia.
2000	- Nace a Asociación para a Síndrome de Down “Down Coruña” .
2002	- A Federación crea o Programa de Emprego con Apoio.
2003	- Nace a Asociación para a Síndrome de Down “Down Ourense “.
2004	- Down Galicia entra a formar parte do CERMI, que é o “Comité Galego de Entidades Representantes de Persoas con Discapacidade”. Traballa para defender os dereitos de todas as persoas con discapacidade.
2006	- Nace a Fundación Down Compostela. - Down Galicia é declarada de Utilidade Pública. Quere dicir que Down Galicia traballa polo interese xeral das persoas coa síndrome de Down e con discapacidade intelectual. - Down Galicia acóllese á Lei de Mecenado. Isto significa que as persoas ou empresas que fagan doazóns a Down Galicia poden ter descontos nos seus impostos.
2008	- Down Galicia, xunto con outras entidades de Iniciativa Social, aposta pola constitución de EAPN Galicia, que é a Rede contra a Pobreza e a Exclusión Social. Traballa para que ningunha persoa sexa excluída da sociedade, por ningún motivo. - Comeza a certificación de calidade dos servizos prestados, por AENOR (ISO 9001). Isto quere dicir que o traballo que fai Down Galicia e as súas entidades membro (asociacións e fundación) faise de forma correcta. AENOR é a empresa que controla este traballo e que di se está ben feito ou non.
2009	- Realízase a planificación estratéxica para o período 2009/2012. Trátase dun documento no que se recolle todo o traballo que hai que facer entre o ano 2009 e o ano 2012.
2010	- A Federación crea o servizo de Vida Independente. - Comezan os cursos e xornadas sobre Aprendizaxe Cooperativa. Trátase de estudar unha nova forma de dar clase para que todo o alumnado participe e colabore na aula.
2011	- Certifícanse en calidade, por AENOR (ISO 9001), todos os servizos e procesos que realizan as entidades membro de Down Galicia (asociacións e fundación). - Renovación da Xunta Directiva por 4 anos.
2012	- Créase o Departamento de Comunicación.

<p>2013</p>	<ul style="list-style-type: none"> - Créase a área de Envellecemento Activo. O obxectivo é que as persoas con síndrome de Down ou con discapacidade intelectual se fagan maiores sen perder a súa autonomía, ao igual que calquera outra persoa. - Realízase a planificación estratéxica 2014-2016 - Renóvase a web da Federación Down Galicia
<p>2014</p>	<ul style="list-style-type: none"> - Conséguese a certificación por parte da Fundación Lealtad como entidade analizada en transparencia e boas prácticas. - Apróbase o novo Plan Estratéxico da Federación Down Galicia 2014-2016. - Créanse os Premios Down Galicia para entregar o 21 Marzo de cada ano. - Obtéñense os Permisos de Inicio de Actividade da Rede de Vivendas Down Galicia (5 vivendas).
<p>2015</p>	<ul style="list-style-type: none"> - Comézase a utilizar unha nova ferramenta de xestión e control da información. - Renovación da Xunta Directiva. - No 2015 celebrouse o Encontro 2015 Persoas coa síndrome de Down e discapacidade intelectual, familias e técnicos das entidades Down.
<p>2016</p>	<ul style="list-style-type: none"> - Organízase o 2º Encontro Nacional de Mozos e Mozas de Down España. - Celébrase o II Encontro de Directivos e Técnicos das Entidades Down en Galicia. - Créase un protocolo para poder detectar canto antes as patoloxías neurodexenerativas, como o Alzheimer. É o Protocolo ASE. - Créase a Revista Down Galicia (trimestral) e o boletín interno (mensual).
<p>2017</p>	<ul style="list-style-type: none"> - Encontro 2017 Down Galicia para persoas coa síndrome de Down e/ou discapacidade intelectual, familias e técnicos. - Participación na elaboración do Protocolo de Inclusión Educativa para persoas coa síndrome de Down.
<p>2018</p>	<ul style="list-style-type: none"> - Down Galicia organiza a “Festa pola inclusión” para celebrar o seu 20 aniversario. - Publicación do “Protocolo de Inclusión Educativa para persoas coa síndrome de Down e/ou discapacidade intelectual” en colaboración coa Xunta de Galicia. - Publicación da “Guía estilo sobre persoas coa síndrome de Down” - Publicación das “Recomendacións de saúde para persoas adultas coa síndrome de Down”.

ENTIDADES MEMBRO

Entidades membro	Teléfono
“Teima” Down Ferrol	981322230
Down Coruña	981263388
Down Compostela	981563434
Down Lugo	982240921
Down Ourense	988370313
Down Pontevedra “Xuntos”	986865538
Down Vigo	986201656



XUNTA DIRECTIVA

Cargo	Nome	Asociación
Presidente	Delmiro Prieto González	Down Compostela
Vicepresidente	Manuel Pérez Cabo	Down Pontevedra “Xuntos”
Secretario	Elías Ledo Fernández	Down Compostela
Tesoureiro	Jorge González Rodríguez	Down Vigo
Vogal	José Antonio Villamarín Cid	Down Lugo
Vogal	José Martín Rodríguez	“Teima” Down Ferrol
Vogal	Manuel Álvarez Esmorís	Down Coruña
Vogal	Rafael Cabezas Enríquez	Down Ourense

PREMIOS E RECOÑECEMENTOS

2004	Premio “ONCE Galicia á Solidariedade” de integración laboral”.
2012	<p>Primeiro Premio da 5ª edición dos Premios Nacionais “Educaweb” de Orientación Académica e Profesional co proxecto “Guía de orientación académica y profesional para personas con síndrome de Down y/o discapacidad intelectual”.</p> <p>Primeiro Premio Nacional do VI Concurso “Voluntarios BBVA” co proxecto “Empleo con Apoyo para personas con Síndrome de Down y/o Discapacidad Intelectual”.</p>
2013	Terceiro Premio Nacional Solidario Cenor Electrodomésticos ó proxecto de Empleo con Apoio.
2014	<p>Premio Luis Tilve “Traballo Digno” ó proxecto Empleo con apoio.</p> <p>“XI Convocatoria de Ayudas” Fundación Solidaridad Carrefour ó proxecto “Aulas Interactivas para la Estimulación Cognitiva de Alumnos con Síndrome de Down”.</p> <p>Premio do “I Concurso de Proyectos Solidarios de la Fundación Grupo Norte” ó proxecto Empleo con Apoio.</p> <p>Premio Accésit Atresmedia ó proxecto “Una escuela para todos: Apoyo a la inclusión escolar de alumnos con síndrome de Down y/o discapacidad intelectual”.</p>
2015	<p>Primeiro Premio Fundación Randstad na categoría institucional ó proxecto “Potenciando el talento profesional: empleo con apoyo”.</p> <p>Premio ao Mellor Proxecto TIC con Beneficios Sociais 2015 ao proxecto “Aulas Interactivas para la Estimulación Cognitiva de Alumnos con Síndrome de Down”, AETG – AMTEGA.</p> <p>Entidade seleccionada e participante no Desafío Solidario 2015 – Fundación Botín: mellora da Educación en España.</p>
2016	Premio Categoría Xeral V edición de Territorios Solidarios BBVA ó proxecto Vida independente de persoas coa síndrome de Down e/ou discapacidade intelectual.
2017	III Premios Redacción Médica á Sanidade de Galicia na categoría de Responsabilidade Social Sociosanitaria.
2018	<p>Premio “la Caixa” á Innovación Social 2017 ó proxecto “Unha escola para todos/as: Inclusión educativa de alumnos/as coa Síndrome de Down e/ou discapacidade intelectual”.</p> <p>Recoñecemento da Fundación Mapfre á traxectoria de Down Galicia pola inclusión laboral das persoas con discapacidade intelectual.</p> <p>Premio “Líderes en Calidade de Galicia” polo sistema de xestión de calidade.</p> <p>Mención honorífica a entidades de acción voluntaria de Galicia.</p>

ÁREAS DE ACTUACIÓN - AS ETAPAS DA VIDA



Área de Atención Temperá: formada por servizos dirixidos a nenos e nenas de entre 0 e 6 anos, para mellorar o seu desenvolvemento físico e intelectual. Tamén se orienta e apoia aos pais e nais para fomentar a autonomía na contorna familiar.

Área de Educación: integrada por programas dirixidos a usuarios e usuarias a partir dos 3 anos e que xa van á escola. Os programas de esta área teñen por obxectivo que as persoas con e sen discapacidade poidan estudar na mesma aula.

Área de Formación e Emprego: dirixida ás persoas que buscan emprego. O obxectivo é desenvolver as súas capacidades para a inserción laboral e mellorar as súas posibilidades para acceder a un posto de traballo.

Área de Vida Adulta e Independente: inclúe programas que ofrecen orientación e apoio ás persoas que desexen vivir soas, en parella, ou con outras persoas.

Nesta área tamén está o programa de **Envellecemento Activo**, que consiste en deseñar estratexias para que todas as persoas poidan facerse maiores mantendo as súas capacidades.

Área Transversal: agrupa os programas que inclúen as persoas con discapacidade, as súas familias e ao resto da sociedade (ocio, sensibilización, intervención familiar).

Área Complementaria: está composta por programas que inclúen a persoas de todas as idades (deporte, habilidades emocionais, expresión corporal, novas tecnoloxías).

RESULTADOS POR PROGRAMAS E ACTUACIÓNS

Atención Temperá. Consiste en traballar con cada neno ou nena, para que mellore as súas capacidades físicas e intelectuais.

É moi importante comezar o antes posible, xa que os nenos e nenas ata os 6 anos son como esponxas, absorben todo o que se lles ensina. Así poden mellorar moito para o resto da súa vida.

Durante o 2018 atendemos:

16 nenas e nenos



Apoio Escolar. Defendemos a educación inclusiva, que significa que alumnos e alumnas con discapacidade e sen discapacidade teñen dereito a compartir a aula. Así non se exclúe a ninguén, e todo o alumnado pode participar na escola e contar con apoios se os precisa.

Nesta área realízanse dous tipos de accións:

- Dáselle apoio ós alumnos e alumnas que o precisan.
- Asesórase ós profesores e profesoras dos colexios.

Os resultados desta área durante o ano 2018 foron os seguintes:

Apoio a 144 alumnos e alumnas
Asesoramento a profesorado de 115 centros educativos



Formación para o emprego. Nesta área, as persoas coa síndrome de Down e con discapacidade intelectual reciben cursos para ampliar os seus coñecementos técnicos e ter máis posibilidades de atopar un emprego.

Número de persoas que asistiron a estes cursos no 2018:


257 persoas maiores de 16 anos



Programa de formación e preparación de oposicións autonómicas e estatais.

Down Galicia e as súas entidades membro levaron a cabo o Programa de formación e preparación de oposicións autonómicas e estatais.

O seu obxectivo é que as persoas que participan neste programa consigan os coñecementos necesarios para presentarse a unhas oposicións en Galicia ou no resto de España.



Neste programa participan persoas que teñen entre 21 e 35 anos e que son de diferentes lugares de Galicia.

Número de persoas participantes no programa:

48 persoas participantes no curso 2017-2018
60 persoas participantes no curso 2018-2019

Alfabetización e formación básica en habilidades instrumentais. O obxectivo deste programa é que as persoas participantes melloren nas súas habilidades instrumentais básicas para poder ser máis autónomos.

As habilidades instrumentais básicas son, por exemplo, as que teñen que ver coa comunicación, as novas tecnoloxías, a lectura ou a escritura.

No 2018 participaron neste programa das zonas de Ferrol e Vigo:

22 persoas no curso 2017-2018
21 persoas no curso 2018-2019

Formación prelaboral e estimulación cognitiva. Neste programa as persoas participantes melloran as súas habilidades sociais e laborais e as funcións cognitivas. Ao traballar estas actividades poderán ser máis autónomos.

As funcións cognitivas son as que teñen que ver con aprender, memorizar, comprender, recordar etc.

Número de persoas participantes neste programa en 2018:

33 persoas participantes das zonas de Santiago, Pontevedra, Lugo e Ourense

Formación prelaboral no sector da hostalería. As persoas participantes neste programa melloran as súas competencias no perfil profesional da hostalería. Así, poderán atopar traballo con máis facilidade.



No 2018 participaron neste programa:

12 persoas participantes da área de Santiago de Compostela

Formación prelaboral en ordenanza. Neste programa as persoas participantes melloran as súas habilidades como no perfil de ordenanza. Deste xeito, haberá máis posibilidades de que poidan atopar un traballo ao rematar a formación.

No 2018 participaron neste programa:

7 persoas participantes da área de Ourense

Inclusión laboral. O obxectivo deste programa é que as persoas coa síndrome de Down e discapacidade intelectual teñan un posto de traballo nunha empresa ordinaria.

Down Galicia ofrece á persoa os apoios que precisa no traballo. Faino a través dun sistema que se chama “Emprego con Apoio”.



No Emprego con Apoio un preparador ou preparadora laboral ensínalle á persoa coa síndrome de Down ou con discapacidade intelectual a facer as súas tarefas no mesmo posto de traballo.

Grazas a este programa, no 2018 conseguimos os seguintes resultados:

219 persoas participantes no programa
178 contratos vixentes no período
74 prácticas laborais vixentes no período
263 empresas contactadas

Servizo Público de Emprego (Información, Orientación e Prospección de Emprego). Realízanse accións para que as persoas con discapacidade sexan capaces de buscar e atopar un posto de traballo.



As principais accións de orientación laboral son:

- Entrevistas individualizadas.
- Itinerario Personalizado de Inserción: é un traballo que se fai con cada persoa. A orientadora laboral indica as actividades e obxectivos que a persoa ten que realizar para atopar un emprego.
- Accións de grupo de orientación laboral.
- Atención ás familias das persoas demandantes de emprego.
- Traballo en rede cos técnicos de Emprego e Formación de outras entidades.
- Información e asesoramento
- Busca de empresas do mercado laboral.

Número de accións realizadas e de persoas atendidas:

223 persoas atendidas
1006 entrevistas de orientación
225 accións en grupo
78 Itinerarios Personalizados de Inserción

Programa autonómico de empregabilidade Down (IRPF). Down Galicia e as súas entidades traballaron xuntas para facilitar a inclusión laboral das persoas coa síndrome de Down ou discapacidade intelectual no mercado laboral ordinario. Este programa é outro dos exemplos deste traballo.

Durante o ano 2018, participaron neste programa:

43 persoas participantes da área de Ourense

Programa de adquisición de habilidades para a vida diaria e a vida independente. As persoas coa síndrome de Down e con discapacidade intelectual tamén precisan apoios para ser autónomas e independentes.



Son apoios para que se manexen por si mesmas na súa vida diaria. Para que realicen por si mesmas actividades de ocio, usen o transporte público, vivan en vivendas compartidas con outras persoas, e tomen as súas decisións elas soas.

Número de persoas participantes no programa:

191 persoas participantes

Programa de Envellecemento. Down Galicia desenvolve un programa de Envellecemento. O seu obxectivo é realizar accións para mellorar a atención das persoas coa síndrome de Down ou discapacidade intelectual cando son maiores.



Para iso, asináronse varios convenios con outras entidades, como a Sociedade Galega de Xerontoloxía e a Federación Alzheimer Galicia.

Ademais, creouse un grupo para traballar sobre este tema, a Comisión de Envellecemento de Down Galicia. Esta comisión elaborou un estudo para detectar o antes posible o envellecemento temperá das persoas coa síndrome de Down.

Número de persoas participantes:

107 persoas participantes

Programa de Apoio Familiar. A familia é moi importante para todas as persoas.

En Down Galicia apoiamos ás familias para que pais e fillos teñan a mellor calidade de vida posible. Tamén axudamos ás familias a que se relacionen entre si e compartan as súas experiencias.



Número de familias participantes no programa:

708 familias atendidas

Programa de Comunicación e Sensibilización Día Mundial da Síndrome de Down

O 21 de marzo é o Día Mundial da Síndrome de Down.

Esta data é un símbolo: o día 21 do mes 3 (marzo). Simboliza que as persoas coa síndrome de Down teñen 3 cromosomas do par 21 das células do corpo.

No ano 2018, Down Galicia celebrou o Día Mundial da Síndrome de Down en colaboración coa Fundación Down Compostela.

Celebrouse unha gran gala no Hostal dos Reis Católicos da capital galega, á que asistiu o alcalde de Santiago de Compostela, Martiño Noriega Sánchez; o conselleiro de Sanidade, Jesús Vázquez Almuíña; e o conselleiro de Política Social, José Manuel Rey Varela. Varias persoas coa síndrome de Down conduciron o acto e leron o “Manifesto pola Autonomía das Persoas coa Síndrome de Down”.



20 aniversario Down Galicia

O ano 2018 celebrouse o 20 aniversario de Down Galicia. A Federación organizou a “Festa pola Inclusión”, un evento con actuacións musicais e de maxia para celebrar este cumpreanos.

Entregáronse os V Premios Down Galicia nas seguintes categorías:

- **Categoría Institucional:** concedido a Feuvert, por ser a primeira empresa que contactou por iniciativa propia con Down Galicia para interesarse polo seu programa de Emprego con Apoio. Nestes momentos ten contratadas a catro persoas coa síndrome de Down e/ou discapacidade intelectual e con previsión de contratar a algunha máis.
- **Categoría Particular:** concedido a José Ramón Vázquez (antigo Coordinador da Oficina de Voluntarios da zona Noroeste de BBVA), pola súa colaboración na implantación e continuidade do programa de prácticas nas oficinas de BBVA.
- **Premio Extraordinario:** concedido a Miguel Carballa e Eloísa Teijeira, por ter colaborado ao longo de moitos anos de forma desinteresada no camiño de Down Galicia a prol da inclusión educativa.



Aparicións en Medios de Comunicación

Durante o ano 2018, Down Galicia realizou diferentes accións para que toda a sociedade coñeza o seu traballo, os logros das persoas coa síndrome de Down e as súas inquiredanzas e reivindicacións. Para iso, enviou notas de prensa e convocou aos xornalistas a actos públicos, para que elaborasen noticias nos medios de comunicación: en xornais, radios, televisións e páxinas web.

495 aparicións en medios de comunicación

Páxina web



A páxina web de Down Galicia, www.downgalicia.org, recibiu en 2018

71.292 visitas

Redes Sociais

Down Galicia está nas redes sociais Facebook e Twitter. Nestas redes sociais publícanse as experiencias e os logros das persoas coa síndrome de Down.

Os temas que máis gustan son os das persoas que encontran traballo, os premios que gañan, e os actos do Día Mundial da Síndrome de Down.

	3.699 seguidores
	1.848 seguidores

Programa de captación de fondos. No ano 2018 tamén se levaron a cabo varias accións para conseguir máis cartos para a Federación.

De entre todas estas accións destaca a organización da Festa pola Inclusión, na que as entradas tiñan un custe de 10 euros.

Programa de desenvolvemento tecnolóxico e comunicacións. A Federación Down Galicia soluciona os problemas informáticos das súas entidades membro. Tamén traballa para manter a seguridade das redes. É dicir, para que ninguén de fóra teña acceso ós datos que se usan na Federación e nas súas entidades.

Programa de apoio e formación a profesionais. Os traballadores e traballadoras da Federación Down Galicia e das súas entidades membro fórmanse para poder seguir mellorando no seu traballo.

O ano pasado foron a moitas formacións organizadas por Down Galicia e por outras entidades externas.

No 2018, os profesionais de Down Galicia asistiron a:

14 formacións



Programa de Calidade. A Federación Down Galicia e as asociacións que a forman teñen implantado un Sistema de Xestión, que se chama Norma ISO 9001.

Isto quere dicir que o traballo que se fai nas entidades membro (asociacións e fundación) é o adecuado para conseguir os seus obxectivos. Os seus obxectivos son apoiar ás persoas coa síndrome de Down desde que nacen ata que se fan moi maiores, para que se vallan por si mesmas.

ALIANZAS

Down Galicia forma parte de outras Organizacións en Galicia e en España.

En España, forma parte de **DOWN ESPAÑA**. Significa Federación Española de Instituciones para el Síndrome de Down, e é a organización de síndrome de Down de todo o país.

En Galicia, forma parte do CERMI Galicia, de EAPN-Galicia e colabora co Servizo Público de Emprego.

CERMI GALICIA significa Comité de Entidades Representantes de Persoas con Discapacidade de Galicia. Defende os dereitos de todas as persoas con discapacidade e os das súas familias.

EAPN – GALICIA significa Rede Galega contra a Pobreza e a Exclusión Social. Esta organización traballa para que ningunha persoa sexa excluída da sociedade, nin por motivos económicos nin por motivos de discapacidade.



Servizo Público de Emprego de Galicia. É o servizo da Xunta de Galicia no cal se inscriben as persoas que están buscando un posto de traballo.



RESUMO ECONÓMICO


Ingresos 2018 [de onde proceden os cartos]

TOTAL INGRESOS	1.406.880,95 €	Porcentaxe
Financiamento público	1.249.569,49 €	88,82%
Financiamento privado	89.922,19 €	6,39%
Recursos propios	67.389,27 €	4,79%



Gastos 2018 [en que gastamos os cartos]

TOTAL GASTOS	1.405.753,24€	Porcentaxe
Gastos de persoal	738.111,91 €	52,51%
Servizos a Usuarios	303.742,85 €	21,61%
Axudas concedidas ás Entidades Membro da Federación	261.982,35 €	18,64%
Cotas e reintegro de subvencións	7.986,47 €	0,57%
Gastos de xestión de formación	9.233,86 €	0,66%
Gastos Órganos de Goberno	55,00 €	0,00%
Gastos xerais	67.069,97 €	4,77%
Amortizacións	17.570,83 €	1,25%



Resultado do exercicio: 1.127,71€

O resultado do exercicio é a diferenza entre o que ingresamos e o que gastamos.

ENTIDADES COLABORADORAS

Públicas



Privadas

